

CHIBAI BUKNA

₹ 4.50

Kumin hi KTP
Presbytery Meet
neih kum a ni.
Presbytery Meet
hmang tûr zawng
zawng te chibai leh
duhsakna kan
hlân a che u.

-CKTP-

KRISTIAN THALAI

MARCH
2011



Kristian Thalai Pâwl Chanchinbu Thla tin chhuak

Vol II No. 13

Rawngbâwl Tûra
Kohna

Phek 3-na


Daniela

Phek 6-na



Phek 11-na

Hmangaikna dik



SYNOD CHOIR 'Through the Ages'

Hlangrakh Ni-a Synod Choir member lo ni rawhte

Kristian Thalai Pawl chanchinbu thla tin chhuak

1970-a chhuah tan ■ Kum 41-naa wawi 3-na ■ Chhuah tawh zat : 390

Editor:

Lalmuanpuia

Joint Editors :

R. Lalhmingthanga

Vanlalhruaia

V.L. Muanchhana

Lalramdina Ralte

Manager :

Lalnginglova Hauzel

A lak man :

Kum khatah - Rs. 50.00

Copy khat - Rs. 4.50

Thu chhuah tùr nei chuan
Editor, Kristian Thalai, Synod
Office-ah thawh tùr a ni a; a la
duh chuan KTP Office-ah a man
pêk lâwk a ngai.

Office Phone : 2326372/2335821

E-Mail :

kristianthalai@yahoo.com

KRISTIAN THALAI PAWL

Thupui

Rawngbawl tùra chhandam

Thupui inngahna

Ephesi 2:10 Thil tha ti atân Krista
Isuaah chuan siana awmin, ama
kutchhuak kan ni si a, chu thil tha tih
chu kan awmna tùrin Pathianin a
buatsaih lâwk a ni.

Thil tumte

1. Isua Krista rinna leh amah anna
kawnga thalaite hrui.
2. Kohhran kut ke ni tura thalaite
buatsaih.
3. Kohhran hnathawh tihputlin.
4. Krista Chanchin Tha puan darh.

A CHHUNGA THU AWM

1. Rawngbawl tùra kohna	3
2. Nun nghet- Daniela	6
3. Depression and Suicide	8
4. Hmangaihna dik	11
5. Thahnemngaihna au aw	14
6. Bial Conference report	16
7. Hruaitu chanchin	19
8. Sex Education	21

Editorial	1	Hlimthla	2
Hringlang tlâng... ..	22	Rimâwi	23
Hrisêlna	26	Hriatzauna	28
Kantu	30&31	Keimahni	32



Pathian ralthuam

Khawvêla kan awm chhûng hian sum leh pai leh dinhmun sâng duhna te, hmingthanna te ûm hian kan hun tam ber hi kan hmang ðhin. Hêng zawng zawng hi nei thei pawh ni ta îla, a bâkah pawh duhbelh zêlna rilruin kan khat a, nun hahchawlhna tak tak neih a har hle. Sum leh pai, dinhmun sângte hi kan thlahlel lo tûr kan tihna a ni lova, eng dinhmunah pawh ding îla Pathian hriatna tak tak kan neih loh chuan lungawina leh nun hahchawlhna tak tak mihringte hian kan nei thei lo a ni. Pathian hriatna tak tak neitute chuan eng dinhmuna ding chung pawhin lungawi zêl an chîng a, an hmaah lungngaihna leh lâwmna alo thlen pawhin Pathian nêan an hmachhawon ðhin.


Setana hian ralthuam a nei ðha ve ngawt mai. Hmeichhiat mipat nawmchenna hmanrua a tawktarh te hi a va han chak kher ðhin em! Tangka sum a hlâwkna leh nawmsakna tûr te hian thil a va tithei êm...! Thatchhiatna leh inthlahdahna te, mahni inngaihpawimawohna te ruiahlo hmanga ðhalaite min beih dân te hi...Hetiana Setana'n hmanraw ðha pui pui nêna duhtâwka a chêt lai hian keini hi engtinng e kan lo invên ang a, engtinng e kan beih lêt ang?

Kristiante ralthuam ðhaber chu sum leh pai te, ropuina lem te, khawvêl thil meterial lam a ni lova, khawvêl thiamna te leh hausakna te hi a ni hek lo. Lal Isuan Thlarau thianghlim pêk min tiam kha kan chan phawt chuan chutah ngei chuan thiltitheina te, lungawi zêlna te a awm a, chumi ralthuam ngei hmang chuan Setana hmanrua zawng zawng hi a hneh theih a ni. Sum leh pai ngah leh Biakin ropui neih te hi Kohhran chakna a ni kher lo thei, Thlarau Thianghlim zâra tihtak zeta Chanchin ðha hril hi Kohhran chakna thapui chu a ni zâwk a ni.

Thiamna leh finna te hi Pathian hriatna tak tak tello chuan hmachhuan tlâk a ni lova, hmanlai aţang tawhin mi tlawm zawok te hmanga mi ropui zawkte hneh hi Pathian duhzâwng chu a ni fo a ni. Chutih rual chuan mifing leh mithiam, Pathian hriatna neitute hlei hlei hi tûnlai hunah chuan rawngbâwlna kawngah an thawhlhîwk a, an thlen chin chinah rah duhawm tak tak hmu tûr a awm ðhin a ni.

*Kawng engkimah, eng dinhmunah pawh ding îla, Pathian hrereng chungin kan hunte hmang îla, a kuta inkawltir zêl chung a hmalam kan pan phawt chuan amân min awmpui zêl dâwn a. Chutiang tûr chuan Pathian ralthuam **thlarau thianghlimin** i inthuam zêl ang u♦*

HLIMTHLA



■ Rawngbâwlpui duhtak, Kristian Ṭhalai Chanchinbu January phêk hnung bera Open Air Concert-a zaite tihah hian, Bâwngkâwna neihah khân Bâwngkâwn Bial aṭangin Band an zai ve a, chhut hmaih palh vâng nge hriatsual palh vâng ni ang aw. Ka rawn hriattir nghal e.

— **K. Lalrotlinga, Leader, Bawngkawn Branch**

I ti dik e. Kan lo chhut hmaih palhah hriatthiam kan dil e.

■ Pu Editor, kumthar chibai le.

1. K.T.P. Handbook bung 1-ah khân November 27, 1953 zânah provisional Committee din a ni, a ti a. A hnua thu hlawn thumnaah February 27, 1953 tih a ni leh a, khawi zâwk nge pawm tûr?

— **Lawmsangzuala, Lungchhuan Branch**

November 27, 1953 hi a dik zâwk chu a ni a, a hnuaia mi hi chhut sual palh a ni e. KṬP chanchin chik tak tak kan awm zêl a, a lâwmarom. He thu Kristian Ṭhalai aṭum thum kan chhanna a ni.

■ Kristian Ṭhalai August 2010 thla chhuak a, 'Mizo ṭawng hman dân dik leh dik lo' tih Upa B. Lalmunliana zia kha a ṭha ka ti khawp mai. Amaherawhchu 'Lal Biakna', 'Lalpa Ṭawngṭaina' a rawn ti daih mai kha Kohhran hruaitu hmasaten Lal Isua zirtir dân ang diak diak lo deuhin, Lal Isua zirtir dân paih chuang si lovin a huhova kan hman theih dân tûr angin an siamrem a, sapṭawngin 'The Lord's Prayer' tih a ni a, a nihna ang taka lehlin chuan 'Lalpa Ṭawngṭaina' tih chu a ni nameuh mai. Mahse, kan mi hmasaten Mizoṭawngin 'Lal Biakna' an lo ti a. Pathianin a ṭanpui bawka, an phuah fuh kher mai. 'Lal Ṭawngṭaina' chu a ni thei tlat lo. Lalpa kan biak(address) ber tûr a nih avângin ani chuan 'Kan Pa' a tih ve kher kha a ngai tawh lo a ni. Lei leh vâna Lalber biao kan ṭawngṭaina a ni. Lalpa Pathian biak nân ber kan hmang a, a ṭangkai khawp mai. Lal biakna hmanga kan ṭawngṭai hi chuan a dang pawh chhamkual vak lo mah ila a fûnkim hle a ni. Chutiang taka ṭawngṭaina thu ṭha chu a ni.

Kan lo changkângin ṭawng kan lo duhtui chho zel a, 'Lal Biakna' tih mai kan duhtâwk lo a, 'Lal Isuan min zirtir angin/hmangin ila ṭawngṭai ang u' te kan ti kher a, a fiahina Chiang bik êm êm a ni. Hetianga han tihkual hi a thui deuh kan ti a nih chuan 'Lal Biakna hmangin ilo ṭawngṭai ang u tih mai hi a dik a ni. 'Lal ṭawngṭaina' ti te-a kan han sawi mai hi chu a dik thei lo a ni.

— **C. Lalmahruaia, Venghnua. Br.**

Kan Kohhran inkhâwm hruaina bu chhuak tharah tihian a inziak - Inkhâwm hruaituin mipui ṭawngṭai tûra a sâwmin "Lalpa ṭawngṭaina/ Lal ṭawngṭaina/ Lal biakna hmangin i ṭawngṭai ang u," tih hi kan tih tlân dân tûr ni se, inang tlâng thei deuh bera tih hi a ṭha e, tiin.

Rawngbâwl tûra kohna

(Rom 12 : 3-5)

- Upa Dr. K.C. Vannghaka, Bâwngkâwn

Rawngbâwltu tih hi Grik ðawngchuan sawi dân chi li (4) a awm a, chûngte chu diakoneo, diakonia, diakonos leh diako te an ni a. Hêngte hian awmze hrang ðheuh an nei a, tûnlai huna Pastor, Kohhran Upa leh zirtîrtu kan tih ang chi sawina hi a ni. Lal Isua ringtu Kristiante rêng rêng hi awm mai mai thei tumah kan awm lo va, kan phâk tâwk ðheuhva rawngbâwl tûra koh kan ni vek. Tumah pawimawh bîk leh pawimawh lo bîk kan awm lo. Kan dinhmun leh kan thawh dân a inang lo mai a ni.

Lalpa hian kan thawh awm tâwk leh kan tihtheih tûr zawng a hre khawp mai. Tling leh fela kan inngaih lai hian min lo thlangin min lo ruat lo fo va, vuivai maite hi a awl rum rum ðhin. Tling tâwk leh lâp ve tâwka kan inngaih lai hian Pathianin min ruat mai lo va. Amân hun a tihah chuan min ko mai ðhin a ni. Chutih rualin eng chanvo mah chelh tum lo mah ila, min ruat miao chuan hnial chi a ni lo tih Jona chanchinah kan hmu. Chuvângin, kan chanvo ðheuh hi Pathian min dahna, Pathianin

ka awmna tûra min ruatna a ni tih kan pawm thiam a ðûl hle.

(1) **Rawngbâwl tûra kotu chu Pathian a ni** : Thuthlung Hlui lama rawngbâwl tûra kohte dinhmun han thlîr chuan mak tak tak kan hmu a. Rawlthar Josefa chu Aigupta ramah bawiha hralh a ni a, Jail-ahte a zuk tâng a. A tâwpah Pathian remruat a lo thlen khân a lo ropui ta a ni mai a. Tlangvâl Davida lah chu a tleirâwl laia Lal atâna hriak thih ni siin Saula khân thah tumin kum 40 zet mai a veh a. Ralmuang pawhin a awm thei lo va; mahse a hun a lo thlen meuh chuan lal ropui tak a lo ni ta a. Jeremia lah kha a thusawi tumahin an awih duh si lo va, khuarkhurumah te an thlâk thûl a, Pathian lakah pawh a vui thei êm êm a, Pathian Thu hi ka puang dân tawh lo, Pathianin min bum a ni, tihial khawpin a thusawi kha engah maha ngaih a ni lo va; Thuthlung Thar lamah pawh zirtîr sâwm leh pahnihte bâkah tirh koh dang - Chanchin Tha hril tûra Thlarau Thianghlimin a koh kan hmu baw. Mahse an rawngbâwl

dân en chuan an dinhmun chu a awhawm lo kher mai; harsatna chitin rêngin a tlâkbuak a ni ber mai a. Mahse anmahni kotu leh thlangtu kha an hriat chian êm avângin harsatna leh buaina kârah pawh huai takin Krista Chanchin Tha hi an puang thin.

Tûnlai huna rawngbâwl tu tam berin harsatna kan tawh fo pakhat chu tu koh nge ka nih a, tu thlan nge ka nih a, tu tirh nge ka nih, tih hriat loh hi a ni fo. Kohhrana rawng kan bâwl naah te hian Thlarau Thianghlim min koh chhan ang ni lo leh Lal Isua rawng bâwl lova mahni thahnem ngaihnaa thawh vaka awl hle. Kan Kohhrana rawngbâwl tu nghet zîngah meuh pawh hian anmahni kotu leh ruattu chu an hriat loh avâng emaw ni dawn ni, hlawh leh eng emaw hamthatna dang buaipui leh awmna tûr chungchângah pawh insawipui te pawh an awm a, vui leh vaina pawh an nei fo thin ni awmin an sawi. Thalai Pâwlah leh Kohhrana rawng kan bâwl naah te pawh hian khawngaih rawngbâwl hna thawk tûra min kotu Thlarau Thianghlim duh dân leh Lal Isua hmangaihna rilru pu lova mahni lârna tûra thawh hi a awl hle a, chutiang mîte chu chanvo tha an chelh lovin an vuivai fo va. Lalpa tâna thawkte erawh chuan lungâwi tak leh hlim takin an thawk thei thin.

Chuvângin he rawngbâwl hnaa min thlangtu chu Pathian a ni a, tha a tih angin min ruat thin tih hi kan pawm thiam a ngai hle.

(2) Pathian chuan rawngbâwl tûra a kohte chu a tichak thin :

Thuthlung Hlui hun aţang tawhin Pathian chuan rawngbâwl tûra a kohte chu Thlarau Thianghlimin a thuam a, a tichak a, a tihuaisen bawkt thin. Thenkhatte pheih chu thilmak tihtheihna, ţawngţai dam theihnate pawh a pe thin. Vawikhat chu ramthar khaw pakhata Krismas hmanga kan kalnaah zankhat chu naupang pakhat hi pum nain a ţap nasa mai a; anmahni chu Hindu chungkua an ni a. A pa mangang chuan ka ţhianpa nên ţawngţaisak tûrin min rawn ko chawt mai a; kan zuk kal a; kan ţawngţai lai chuan a ţap nasa khawp mai a, kan ţawngţai lai la laa a dam nghâl mai loh avâng chuan Pathianin a tih dam loh kha ka hlau khawp mai a. Mahse kan ţawngţai zawh chuan a ţap zawi tial tial a; rei loteah chuan a bâng ta a. Damdâwite kan pe a, kan hawsan ta a. A tûka kan hmuh leh pawh chuan engtîn mah a awm tawh lo va, ka lawm khawp mai. Chumi ţuma ka thil hriat chhuah tak chu kan kutah hian damna a awm hran lo va, min tîrtu Pathian duh dân anga ka tih hian kan kut leh kan

ṭawngṭaina hi a hmang mai a. Chu chu Kohhran Upate chauh ni lovin Ṭhalai hruaitu leh rawngbâwltute tân pawh a lo ni tih hi. Chuvângin Paulan Timothea hnêna Pathian thilpêk a dawn chhêm alh zêl tûra a ngen ang khân (II Tim. 1:6) keimahni ṭheuhva Pathianin thiltihtheihna a dah hi chhêm alh zêl tûra kan inhlan thar reng a ngai a. Tichuan Pathianin min hmang reng thei dân a lo ni.

(3) Mi dangte tâna inpete hi Pathianin a hmang ṭhin : Kan Bible bu pumpui han chhiar hian mi ingaitlâwm, mi dangte tâna inpe ṭhinte hi Lalpa'n a rawngbâwltuah hmang ṭhin a. Thuthlung Thar bu kan chhiar pawhin Baptistu Johana chu mi ingaitlâwm tak mai a ni a. Mipuite hnêna simna thu a tlângaupui lai khân Judate'n, *'Tunge i nih?'* Eliza i ni em? Zâwlnei i ni em? tia an zawh pawhin *'Krista chu ka ni lo, Lalpa kalkawng tirtual rawh u, tia thlalêra autu aw kha ka ni e' tiin Krista lo kalna tûra atâna a kawng buatsaihtu mai a ni a, a pheikharok hrui phelh tlâk pawh ka ni lo, a ti (Joh.1:19-27). Kei chu ni ila ka pa hnêna vântirhkohvin ka pian tûr thu a lo sawi lawk dân kha chapo takin ka sawi ngei ang. Mahse ani chuan a chanchin engmah a sawi duh lo. Khati tak khân ingaitlâwm mah se, kan*

Lalpa chuan *'hmeichhe hrin zawng zawngah Johana aia ropui zawk tumah an awm lo'* a ti (Lk.7:28) Missionary ropui, Paula pawh khân, *'Tirhkohte zînga tê ber, a hun lova piang ang, tirhkohva vuah tlâk loh ka ni'* a inti bawk a (I Kor. 14:8&9). A chanchinah khân chhuan tûr tam tak a nei tih kan hria. Thlarau Thianghlimin a hman nasatzia pawh kan hria. Paula hi awm ta lo se, khati khawp khân Chanchin Ṭha hi a darhzau châk lo mai thei a ni.

Hetih rual hian kan Lalpa chuan mi chapo leh intih lansarh tumho erawh a dem hle tih Pharisaite leh lehkhaziaktute chungchâng a sawinaah kan hmu. Keini pawhin mahni mâwina leh lârna tûr mai atâna rawngbâwl kan nih chuan rei loteah hnâwlin kan awm ang a; ingaitlâwmna nêna mi dangte rawngbâwlsaktu kan nih erawh chuan miten min chawimâwi nghal mai lo mah se, kan nunah Isua hmêl an hmu ang a, kan Lalpa ropuia a lanna apiangah keini pawh hi ropuiin kan lang ve mai ang. Chuvângin kan Lal Isuan, *'Tupawh hotua ṭan duh chu mi zawng zawng chhiahlawhah a awm tûr a ni'* a tih kha hrereng ila. Mite rawngbâwlsaktute hi mi langsâr leh hruaitu chu an lo ni ṭhin tih hi i hre thar ṭheuh ang u ♦

Nunphung zirna

Nun nghet - DANIELA

- Upa Zarzokima Khiangte
Shillong - 21

Thuhma : Daniela hi kum 15/16 vêl a nihin Babulon sal tân hmasa ber(605 B.C.) khân Babulon-a hruai a ni a. Tleirâwlte a nih lai ațangin Pathian rawng a bâwl a ni. Ezeikiela pawh naupangte ala nih laiin Babulon-ah sal tân tûm hnihnaah hruai ve a ni a. Kum 30 vêl mi a nihin Pathian thu a tlângau pui tan a ni (Ezek. 1:2,3). Zâwlnei Jeremia pawh Pathian kohna a dawnin naupangte ala ni (Jer. 1:6). Kum 20 vêla chhûta ni.

Zâwlnei Jeremia te, Zephania te, Habakuka te leh Ezeikiela te hi Daniela dam rual puite an ni.

Daniela hian Babulon milian te zîngah Pathian thuchah a puang a, hetih lai vêk hian zâwlnei Ezeikiela'n Juda sal tângte zîngah rawng a bâwl a, Jeremia'n Jerusalem-ah Pathian thu rinawm takin dodâlna kârah a puang bawh.

Daniela hi milian chungkuaa mi a a ni(Dan.1:4; 2Lalte 24:14). Sawrkâr pahni a lal pathum te hnuaiah Prime

Minister emaw Adviser emawin a awm a ni.

Daniela te ang a, ram dang a, ringlo mîte zînga, mi tlênte (minority) ni chung pawha an rinna tilang ngam leh danglam ngam Bible-ah hian kan hmu nual, chûngte chu :- Josefa, Nehemia, Estheri & Mordekaia te an ni.

Daniela nun ațanga kan zir tûr tlêm lo târlang ila :-

1. **A danglam ngam :** Daniela hi Pathian duhloh zâwngah 'Aih' tingam a ni. Khawvêl mîte chuan, khawvêl nê inrem (conform) tûra min tih laiin, Pathian chuan danglam(transform) tûrin min ti thung (Rom. 12:2). Dan. 1:8-ah chuan, 'Mahse Daniela chuan a rilruin lal chaw leh uaiin in thin te chuan intihbawlh-hlawh loh a tum tlat a', ... tih a chuang a. Tah hian Daniela tumruh zia leh a danglam ngam zia a lang Chiang êm êm a ni. Hmân deuh tawh khân Illustrated Weekly magazine-ah Mizo thalaite ngainat zâwng thil pathum a sawi chu - Silai(gun), Guiter(music) leh zu a ti a, ngaihtuah ati thui duh hle. Silai ngaina han tih chu a pa hle awm e. Hnam dangte hian hmeichhiat mipatna kawnga zalên deuh hian min hmu thin niin a lang a, hei erawh hi chu a duhawm fahran lo a ni.

KTP member-te zîngah - a hmei apain puipun nikhuaah zu no lo dawm thei kan awm leh

thin hian, a huna danglam ngam lo kan nihzia a tichiang leh thin. Zu chang a ni lova, Bible hian ei leh in theih luattuk pawh hi a sawisel a ni. Amaherawhchu fimkhur rawh u...ei puar lutuk nen, zu ruih nen... in rilru a khat lutuk hlah ang a (Lk. 21:34). Sodom sualna pakhat pawh ei puar lutuk a ni (Ezk. 16:49). Daniela'n lal chaw duhsakna a ei duh lo hi Bible-in min hrilh chiang lo na a, vawksa emaw, an pathian tâna an inthâwina thil emaw a nih a rinawm. In ei pawhin, in in pawhin, in tih apiangah pawh Pathian ropuina tûr hlîrin ti rawh u (I Kor. 10:31) tih ang hi Daniela rilruah a lo awm tawh a ni ang. Sa tel lova thlai chauh rin pawh a that tâwk zia Daniela nunah hian a lang a ni. Bible-a vegetarian kan hmuh hmasak ber pawh a ni awm e.

2. **A nun a nghet :** Kum tam tak ringlo mîte zîngah khawsa mahsela, nghet tak leh huaisen takin a Pathian rinna a chhawm nung reng a, hnungtawlh nân emaw inthlahdah phah nân emaw a hmang chuang lo (Lev. 6:12; 2Tim.1:5; Juda 24). Thih thlengin rinawm takin a rinnaah a ding a ni (Thup. 2:10) Kum 3 chhûng Babulon finna leh hriatna zir tûra tih a ni (Dan.1:5). Babulon ho hi mîlem bia, Pathian tak hrelo an ni. Chuvâng chuan an culture pawh Pathian tak

biakna tello a nih a chiang. Aienna, dawî, arsi chhûtna leh mîlem biakna te hi an syllabus a nih hmel hle a ni. Hei hi rei tak zir mahsela Daniela rinna hi a nghing chuang lo.

3. **A hmêlma ten a nunah sawisêl tûr an hrelo :** Mi rinawm leh mi dik a nih avângin, hlemhlêtna (corruption) lakah a fihlim si a, a Pathian biak dânah remchâng an zawng ta a, Lal thuneihna vervêk taka hmangin Daniela chu an âwk ta a ni. Amaherawhchu Pathian ropuina lan tîrtu a lo ni zâwk.

4. **Ṭawngṭai mi a ni :** Nitin vawî thum a ṭawngṭai thin (Dan. 6:10). Kristiante kan chaklohna ni fo chu, a bîk takin ṭhalaite'n ṭawngṭai leh Bible zir kan taima lo hi a ni. Zân meng rei, zîng tho tlai kan tam lutuk, hma a sâwn theih loh. Zîng thawh hma a, ṭawngṭai leh Bible zir te hi kan tih tûr hlih hlih a ni.

5. **Pathian tân mi ngainatawm a ni :** Pathian thlarauin a chenchilh bawk avângin mumang leh inlârna te hrilh fiah theihna te Pathianin a pe a ni.

Tlipna : Pathian kohna chhang tur hian kan tlin leh tlinlohna lam ai pawhin kan inkauna a pawimawh zawk. Hman theih (usable), zirtir theih (teachable) leh inkauna/ inhawnna availability) hi a pawimawh a ni ♦

Depression and Suicide

— P/P R. Lalthlengliana,
Luangmual

Depression han tih hian enge a kawh tih mi tam tak chuan kan hre kher awm lo ve. Depression avâng hian mihring nunah hian chhiatna nasa tak a thleng thei thin tih kan hriat a tha awm e. A hmasa in Psychologists ten rilru lam natna an thliar hran dân lo thlir hmasa phawt ila. Psychologiste chuan Mental Disorder hi chi hrang hrang in an then a, World Health Organization ina a then dân a awm a, chu chu International Classification of Disorder (ICD) a ni a. Chumi bâkah chuan American Psychiatric Association (APA) in a then dân a awm leh baw. Chu chu Diagnostic and Statistical Manual(DSM) an ti a, hetiang lo deuhva thenna pawh hi hmun thenkhatah chuan a awm baw kawm e. Amaherawh chu he mîte pahnih hi a lâ zual leh khawvêlah pawh an hman tlânglawn deuh ber an ni. Tûnah hian International Classification of Disorder(ICD)-10 hi Psychiatrist-ten an hmang mêk a ni. Diagnostic and Statistical

Manual(DSM)-IV pawh Clinical Psychologist ten an hman mêk a ni baw.

Mental Disorder-te (Rilru lam damlohna) hi hlawm lian pui pui pahnihah an then leh a, chu chu Psychotic leh Neurotic an ni. Psychotic chu natna nasa leh khirh, miin a lo vei chuan tihtam pawh harsa leh khirh, a vei te chu mi a nileng kan tih ang te hi an ni ber. Psychotic lâ zual deuh deuh te chu Schizophrenia, Manic Depressive Disorder etc. an ni a. Neurotic erawh chu khirh leh nasa ni vak lo, a veite pawh mi a nileng ni lem lo, an nitin hna pawh buai vak lo, an hna pawh tha taka thawk thei, mahse mi pangngai ina an buaipui nasat vak loh buaipui a, an chhûngte pawhin an buaipui thinte hi an ni. A lâ zualte chu Anxiety Disorder-te, Mood Disorder etc. te an ni. Tûna kan han sawi mêk Depression pawh hi Neurotic kan tihte zînga mi a ni.

Depression hian kan hriat lutuk lem loh leh Depression a ni tih pawh kan hriat loh hian min chîm viau tawh a. Nun beidawnna kawng hrang hrang mihring nunah a lo thleng thin a, hna avângte, ngaihzâwng avângte, leh chhûngkaw innghirnghona avângtein miin harsatna chi hrang hrang an tawh phah fo mai. Nguina emaw nguaina emaw a lo thleng

thin, chhan hrang hrang avângin hlim lohnate, beidawnnate, damchhan nei tawh lo nia inhriatnate a awm thin. Chutiang chu a awm a nih chuan Depression a ni duh hle. Mahni inngaih lutna tlahniamte, zân mut theih lohte, a hmaa tuina thin a tui theih tak miah lohte, chaw châkna neihloh te, thin kawm chaklohnate, eng thil maha concentrate theih lohnate, eng tiklai mai pawha chauh hluah hluah maite hi Depression signs and symptoms chu a ni thin.

Depression lo awm chhan chu a tlangpui kan sawi tawh a, a chunga kan sawi bâk ah khian thluak lam hnathawh (Body Chemistry) avângte pawhin a awm thei ve tho tih kan hriat a tha hle bawk awm e. Tûn lai in Mizoramah he thil hian min tih buai tâk êm avâng leh Depression-in a ken tel fo thin mahni intihlumna (Suicide) hi a hluar tâk êm avângin ngaihthah theih a ni ta lo tlat mai. Thalai zingah hei hi a hluar ta êm êm mai hian rilru a ti na hle a ni. Kum 2009 chhûng khân mi 62 Mizoramah an intihlum a, kum 2010 (Oct. 20 thleng) ah mi 69 an intihlum bawk. A tam ber chu thalai an ni tlat mai. Hei hian ngaih a ti tha lova, ngaihven a ngai ta a ni.

Kan tûn lai khawvêl hi a danglam in hmasâwnna a nasa

êm êm mai a, hei hian changkâng taka nun tumnaah min hruai lût nasa hle in a lang a. Information Technology-ah hmasâwnna a chak êm êm a, a zuan in a zuang dawrh dawrh a ni ber mai. Internet kan hmang uar hle a, Social Networking sites, hêng - Orkut, Facebook, MySpace, Frenzo etc. te hi thalaite'n kan hmang uar a, nghawng tha lo keimahni-ah a thlen tam hle in a lang. Mithiamte'n Kum 1982-1994 inkâra piangte hi *Generation Y* tiin a hming an vuah a, anni ho hi an changkâng êm êm a, IT lama hmasâwnna in a chûm tawh leh chumi kâra sei lian an nih tawh avângin an rilru a danglam zar mai. Kum 1995-2002 a piang, *The Millenial Generation* ho ngat pheih hi chu danglam tak hi an ni ringawt mai. Emo culture in a rûn hi a ni ngawt a. Kawng engkimah an zei êm êm mai a, an zak vak lo bawk a, hlim tak leh thawveng taka khawvêl hi hman an tum a, Globalisation-in a ken tel thilin an nunah bu a khuar thûk hle bawk a, thil chhuak thar apiang neih an tum zêl a, chu chuan awhna tha lo-ah a hruai lût thin.

20th Century kha Age of Anxiety tiin an lo sawi a, hei hian mihringte rilru hah tawhzia a târlang Chiang hle rêng a ni. Hmasâwnna a nasa telh telh a, chu hmasâwnna avâng chuan

mihring taksa a hahdam telh telh a, taksa chhûnga awm rilru erawh chu a hah telh telh mai thung. Rilru lam hrisêlna kan ngaihtah êm êm a, taksa hrisêl nei tûr chuan ei leh in tha nên theih tâwp kan chhuah thin a ni lâwm ni? Rilru hrisêl kan neihna tûr erawh chuan engmah kan ti thung lova, nawmchenna lam kan uar vak a, chumi nghawng chu kan tuar ta ni berin a lang. Depression leh Suicide kan ramah a hluar ta tlat. Rilru lam hrisêlna ngaihpawimawh a tûl thlu ta a nih hi le.

Nuam lutuk leh lungkham nei miah lo, changkâng thei ang ber a khawvêl hman tumna a len êm avângin Fashion chhuak thar apiang neih duhna a awm a, kan sum neihin a tlin leh tak tak si lo a, nula thenkhat chu top-up man atân te an in zuar a, chu chuan mahni inngaihhniamna a siam thin. Depression a tâwpah a lo lang ta thin a ni. A khawvêl thei angber leh hlim thei tâwpa nun chen tumna rilru a lian a, party, Birthday lawm, etc tih vêl ringawt buaipui thin kan thahnem ta deuh a, engtik lai pawha nuam lutuka khawsak reng theih a lo ni lova, pawisate neiin hlim takin awm châng awm mahse beidawwna thlentu a ni fo mai si a, Depression a lo lang leh mai thin. Eng anga nuam pawhin hun hmangila, a tâwpah nuam tih tak tak tawh

lohna a awm ta thin si a, chaw ei tui lohnate, thian kawm châk lohnate a lo awm a, zân muttheihlohnate etc. A rei zêla, enkawl loh chuan Mahni intihhlumah an tlâk phah fo thin.

Mental Disorder (Rilru lam damlohna) pakhat ve mai a ni tih erawh chu hriat reng tûr a ni thung. Depression chu enkawl lohva rei tak a awm chuan Suicide a nghawng chhuah thin avângin mitinin a enkawl na kawngah mawhphurhna kan nei a ni. Rilru lam Doctor Psychiatrist emaw Clinical Psychologist te enkawl tûr chauhvah kan dah chuan a fuh lo hle ang le. Khawvêla Psychiatrist thiam ber berte pawhin Sakhaw rawngbâwltute hi Depression enkawl tûrin *an tha ber a ni* an ti tlat. Mizoramah chuan Kohhrana rawngbâwltu tawh phawt chu hêng rilru lam doctorate (Psychiatrist leh Psychotherapist-te) tluk thovin kan tangkai thei a ni tih i hria ang u. Lal Isua hi kan beiseina a nihnte fiah taka kan hrilh a, beidawngte tân beiseina, chaklo ber tân pawh chakna a ni tih kan hrilh phawt chuan a tangkai hle ang le. Midangte ngaihsak ila, Lal Isuan a hmangaih a ni tih kan hrilh chuan engah nge Depression an neih reng ang a, an intihhlum ang? Chuvângin kan mawhphurhna hi hi i hre thar teh ang u ♦

Hmangaihna dik

— *Lalmuanzova Khiangte*
Lunglei, Electric Veng

Hmangaihna zet hi zawng a nunrâwng êm êm a, mahse, khawvêl ti nuamtu a ni si. Rilru na taka siamtu a nih laiin kan natna thâwidam nân damdâwi tha tak a ni thung. Tihpui tam tak an awm laiin damchhana hmangtu tam tak an awm si. Hrilhfiah harsa tak a nih laiin hrilhfiah tuma thu leh hla tam tak lo piang a tam si. Khawvêl hi a tihbuai êm êm laiin a tel lova khawvêl awm dân tûr chhût ngam a ni si lo. Beiseina zawng zawng tibotu a nih laiin beiseina thar lâwmawm tak hringnuna hian a thlen fo thîn thung.

A bîkin theirâwlte leh nula tlangvâlte'n "*Ka hmangaih a ni, a tel lo chuan ka hlim thei lo, ka tlei zo lo...*" an tih hian tam zâwk chu, '*thil an ngaihtuah chian loh vâng a ni*' tiin sawi ta ila pawm lo fê fê chu kan awm ang. Chumi hmian hmangaihna dik sawi hmasa dawn teh ang.

Phûl lêt nei lo hmangaihna emaw, vâng awm lova hmangaihna hi hmangihna dik tak chu a ni.

Hmangaihnaah hian a dik lo a awm ngei ang, chumi avâng chuan hmangihna dik ti mai lovin '*hmangaihna dik tak*' tih tawngkam a lo chhuah phah hial rêng a. Phûl lêt nei lo hmangaihna emaw, vâng awm lova hmangaihna hi hmangihna dik tak chu a ni. Kan hmangaihte chungah hian phûl lêt kan nei thîn tlat. Mihringte chu that leh that inlâwm tawn mai mai kan ni thîn. Chu kan phûl lêt chu a hlawhtlin loh chuan kan hmangaih kan tih tluk ni mai lo, a aia nasain kan haw lêt hial thîn. Keimahni nawmna leh hlimna kan duh avâng zâwkin '*chuti ang khati ang chuan awm ila, ti ila, ti se*' tiin kan hmangaih a, kan hmasial vângin anmahniah keimahni kan inhmangaih a lo ni.

Hmasialna hi mahni duh ang awm a ni mai lo va, mahni duh ang zâwnga mi dangte awmtîr tumna a ni fo, tih a nih kha. Pathian thianghlimna a tanga teh hian mihringte hi chhe-lai-let-dêr kan ni a, Pathianin min hmangaih hian phûl lêt leh chuan tûr keimahniah a awm lo, mahse, phûl lêt tel miah lova min hmangih avâng hian hmangaihna dik a ni. Mother Teresa khân mi retheite leh tawp tak taka kan ngaihte kha duat taka a enkawl khân, pawn lam en lovin, amaha hmangaihna dik a awm vâng

zâwk a không thil kha tithei
niin a lang bawk.

Nupui, pasal, ngaihzâwng
kan zawn hian pâwnlam
landânah kan thlîr hmasa ber fo
thin a. Pâwnlam lan dân a kan
mit a tlun vâng a *ka hmangaih che*
ti ta kan tam viau ang. Chuti ni
lo se, tumân nupui pasal emaw
ngaihzâwng emaw kan zawnin,
pitar putar hi ka hmangaih che
kan ti ngai lo. Hmangaih chhan
tlâk awm lo hmangaihna hi
hmangaihna dik a ni a. Keini
chuan hmangaih chhan tûr kan
zawng a, kan en hmasa fo.
Chhan leh vâng neia hmangaih
vek kan ni. Kan ngaihzawng kan
hmangaihna te hi an hmai vunah
te hian zuk awm tlât thin a!

Hmangaihna chuan a
dawhthei a, a tâwp thleng in a
tuar hrâm hrâm thin. Inhmuh leh
inkawm ngeih laia hmangaih
ang taka lang hi rei tak awm
hran hian inphatsanna a lo
thleng thin. A tâwp thlenga tuar
chhuak thei hmangaihna an neih
loh vâng a ni thei. Phatsantu lo
zâwk lahin *'Lêng dang an tam êm'*
tiin a hmangaihna dawhtheihna
in a tlin ta bîk thin lo.
Hmangaihna dik takah chuan
awm ho hian hmangaihna a
tichak a, awm hran hian
hmangaihna a ti pung tih a nih
kha. Chutah tak chuan kan
hmangaih kan tih, kan
thlâkhlelh êm êm te hi
khuahmuna kan awm loh rei

chuan mihring hi a lo
intheihnghilh theih
(theihnghilh hian hriat tawh
miah loh lam a kâwk lo va,
inthlâkhlelhna leh inngaihna te
a ti bo thei). Khawhrana awm
vâng a inthen ni lovin,
hmangaihna dik tak a nih loh
vâng a in thlah ta mai kan ni
zâwk awm e. Inthen hlim leh
inthen hnu deuh chuan *'Ka then
thei lo, ka theihnghilh thei lo'* te kan
ti a. Kan theihnghilh nghâl ten
a dik nâng, mi pangngai kan ni
nang. Hun hian mihring rilru
natna te a thâwidam mai thin
chauh alâwm.

Hmeichhe dinhmun hi a
chhe zâwk a ni fo. Mipa tam tak
hian taksa chauh duh vâng in
nupuia an duh lêm loh pawh *'a
ber'* ang hialin an kâwm kual

**Zahawmna hlan phal loh
vâng a kalsantu tûr che chuan,
a tih chhiat vek hnuah a kalsan
dâwn tho tho che.**

thin. Hmeichhe âtna lai a lo lang
leh a, a thinlung zawng zawng
a lo pe a, a zahawmna pawh a lo
hlân phal mai thin. Laklawh
vâng in mipa tak tak chuan innei
mai tûrin thutlûkna an siam thei
mai a, thenkhat chuan an kalsan
vâng vâng thin. Hmeichhia in a
zahawmna a hlan phalna hi a
hmangaih thûkzia a entîrnaah a
ngai a, zahawmna hlan phal loh
chuan hmangaih lo angah a ngai
leh a. Chu chu hriain mipa tam

takin sex-a kar chuahna'n an hman hial thin a ni. Min duh vak lotute tihlâwm nan sex hi hmatheh chi a ni lo. Mipa rilru put hman dikah chuan hmeichhia hian a thianghlîmna hi inneih a, inkutsuih hma chu vawng se an duh a, vawn pui pawh a duh bawk thin. Hmangaihna nain vêngte a ti khawlo ngai lo a, hei hi hmeichhia in hriatreng tûr a ni ang. Zahawmna hlan phal loh vânga kalsantu tûr che chuan, a tih chhiat vek hnuah a kalsan dâwn tho tho che. Hmangaihna thu mal hmatheha sex-a kartu che chu **I hmelmâ** a ni. Hei hi i tân vau lâwkna a ni. Tah hian mi tam tak an tlu a, an tlu zêl dâwn.

Hmangaihte neih theih loh avânga intihhlum te, bantlang tate an awm a, hêng mîte hmangaihna hi a dik hmêl bîk riau thin. Mahse, anmahni an intih hrehawmna chuan a neih theih tâk loh khân engemaw hrehawmna nei ve se a duh vâng a ni fo. Pâwl kalsual ang deuh hian an rilru an

kalsualpui a, chan tâwka lungawi ni lo, chan loha lungawi zirtîr an ngai a ni.

'Ka hmangaih che' kan tih hian kan rilru lamah chuan duhna nêh hian a danglam chiam lo mai thei a ni. Kan hmangaihte hi an hlimna zâwk tûr a nih chuan an duh dâna an awm phalila, mi dang an neiha an hlim zâwkna tûr a nih chuan chu chu kan hlimpui ve thei tûr a ni ti pawh an la awm lehzel a ni.

Tûna hmangaihna dik lo kan tih hian inneihna a hring reng tho ang. Keini erawh chu kan inven a pawimawh thung. Tûna ka phûl lêt neih vânga ka hmangaih hi ka bânsan dâwn em ni tih lam a ni lo. He rilru hi puin, kan nunpui thiam tûr a ni. **"Inneih a rem chuan ka duh ang, a theih loh pawhin mahni chhiat phah nûn hman loh tur."** Min duh chuan a lâwmawm, duh loh pawn a tha vek zêl e. Chuvâng chuan nupui pasala kan duh loh tûr chu kan tichhia in kan kawp lo tûr a ni ang♦



■ George Frederick Handel-a kha sum dinhmuna a tlâk chhiat lai berin siam tharin a awm tlat asin! A pawisa batnate'n lung ina khung mai tûrin an vau a, ani lah a pangkhing a zeng deuh lehngâl. Chu hun khirh ber laiah chuan a inkhung hrang a, ni danga a neih phâk hauh loh Pathian pâwl na ropui tak a dawng ta a. He hun chhûng hian alâwm a hla ropui ber **'Halleluia Chorus'** hi a puah a ni.

-Our Daily Bread

Thahnemngaihna au aw

— Lalpanliana
Sailulak Branch

Rmânah Mizo thalaite zîngah chuan dam khawchhuah nân hnathawh a ngai tih hriatna chuan nasa takin hna a thawk thin a. Mahse tûnlai chhuanah ve zawng Media hmasâwnna chak tak chuan tuipui râl aţangin Zofate nun inhrutruul tha tak, inhungbîkna sadai churawn zuankhûmin, a theihna leh thiamna zawng zawng hmangin kan inchhûng ngeiah rawn lûtin, a thil siam chuahte chu minrawn zawrh ta mawlh mawlh mai a. An felin an fing si, kan ngaisâng ta êm êm a, anmahni anga nunkhua hman ve kan châk a, mahse tûn ang dinhmun thleng tûr khuan engtiang takin nge an lo thawhrim a, an lo beih nasat tih lam rêng ngaihtuah leh miah si lovin changkân a, hausak ve dân kan ngaihtuah ta a.

Mahse chûng hausakna te chu chuti maia thâwkkhat thila neih mai theih a lo ni si lo. Kan chhût kan chhût a, thawkhah lem loa neih theih dân awm tlata hriatna kan nei ta a. Chuan,

kan rilruah nasa takin hna a thawk a, hausak thut theihna kawng awm hnai ber leh awlsam nia kan hriat politics-ah chuan Zofate chu min zuan luh tîr ta a. Mahse, nihnuhnunga chanchin tha hril tûra a tih, Tuipui râl ram hlatak aţanga a zawn chhuah rama kan politician-te chuan khelkh dik aîin khelkh fuh an tum thin a. Dik taka rorêl ai chuan thuneihna fawng vawn rei dân ringawt an buaipui a, chutiang chu kan nunphung leh kan khawsak dân alo nih tâk nuaih siah chuan Missionary tam tak tîr chhuak chungin kan nun a chirî a, rorêltu leh a rêlsaka te chu in bum tawn kan tum ta suau suau a nih ber hi.

Khawvêl changkânna lah chuan mikhual chelhfuh laklawh ang maiin Zoram khaw kilkhâwr ber thlengin min chamchilh ta tlut tlut mai si a. Chu changkânna chuan, *‘I mamawh ti sâng rawh, chu chu changkânna a ni, mamawh neih tlêm tlêm chu changkân lohna a ni tlat’* tih chu min zirtîr ta tlut tlut a. Chumi kârah chuan Media hmangin, *‘Lei tarop rawh, chu chu thil tha neihna a ni mai’* an lo ti ve chamchi nê. Neih ve tumin kawla nichhuak chhiarin sadai êk kan han ham pherh ngial a, mahse chûng kan thawhrimna leh thawh ve te chuan Bazâr-ah hmun a chang pha leh thin si lo.

Chutih laiin sawrkâr hnathawk te hlawn lah chu, ãanpuina vehbûr khawn ang mai a pung thûr thûr a, chu chu sumdâwnngten Zoram dinhmun tângpuia h ngaiin an thil zawrhte chu an lâkna rate ngai reng mahse aman an han san ve leh dawrh a, tutenge tuar ta? Sawrkâr zêm zen ve lo leh mipui mimir chuan kan tuar ta ãin a ni hi. Tiang hian Zoram mipui nun hi ala inhrûtrual ãa kan ti em? Tiang zêl hian kal ila kum sâwm hnuah chuan tlasik laia lipui mawng tlu k zeta chiangin a hmuh theih a lawm... midik rahbeh ten an tuar peihloh hun a thleng ang tih hi thil hlauhawm tak a ni.

Chuti a nih tak siah chuan kan chênna, kan Zoram khawvêl chu tutenge siam ãa ta ang? Tûnlai khawvêl hi tute khawvêl nge? ãhalaite khawvêl kan ti a ni lâwm ni? Mi rama kan kum rualpui ãhalaite thiltihte hi kan ngaihtuah ngai em? Madras te pawh Chennai tia thlâka, Bombay te pawh Mumbai tia thlâktute hi an ram ãhalaite asin an nih.

Mizo ãawngah hian *kuanglo nawr* tih hi a lâ hle a, a leh lam chiah *kuang nawr lo* tih lam hi kan ngaihtuah ngai em le? Ringtute hian kan kuang hi kan nawr chiah em? Politics leh Zoram siamãhatna hi ringlo tute tihtûra kan dah a, Politics hi kan

sihal fûr tuilian thlûr mai a nih chuan kan kuang kan nawr lo tihna a ni thei ang. Zoram siamãhatnaah hian Kristian ãhalaite hian mawhphurhna sâng tak kan nei a, chu chu kan koah Lalpa'n a ngatsi. Kan ram ãap thawmin Lalpa hnên a thlen hma leh, '*sim rawh u*' tia vân khawpui a au hma hian harha puan ven sawi chhin a va hun tawh êm!

'*Hawh u, I din thar leh ang u*' tihte hi inkhâwmpui thupuia hman a, ngainawm taka sawi leh ngaihtlâk mai duhtawk lo hian a takin i lantîr tawh ang u. Kristian ãhalai Pâwlte hian Zoramah hian Lalpa chênna tîk Lalram i din thar teh ang u. Chutianga hun hlimawm leh nuam thleng thei tûr chuan mahni ãheuh rilru kan siamthar a ngai a ni. Mahni danglam phawt lo leh insiamrem hmasa lova, kan nihphung ngai renga kan awm a nih chuan a chhe zîngah rau rau a chhe ziaawm deuh kan thlang kan thlang ringawt ang a, chu chuan ram ropui min hruai thleng chuang lovang. Thlalêr ramrovah pawh uluk taka Lalpa hniak hnu chhui thei tûr, Pathian ãih mi, Lalpa malsâwm ram rim nam kan ramah hian an awm ngei ang. Hmatiang kan sâwn theih nân ãawngãaina nê n Pathian i dâwr tam deuh deuh ang u ♦

— BIAL CONFERENCE REPORT —

January ni 21-23, 2011 chhûng khân Bial hrang hrangah KṚP Conference neih a ni a, a hnuai a târlan te hi Bial hrang hrang Rorelte a ni. Budget tarlan loh bialte hi Conference rorel mîla bial Committee-in budget a siam thînte an ni.

Suangpuilawn Bial (Member 719)

Lamherh Kohhran Biak Inah neiin thupui ah "I Pathian tâwk túrin inpeih rawh." (Amosa 4:12) tih a ni a, Bial hruaituten thupui hi an sawi a ni.

Rorelte :

1. 2011-2012 Budget ₹. 38,700/-.
2. 2011 chhûngin Presbyterian Hospital, Durtlâng tân tanpuina sum pêk ve ni rawh se.
3. Kum 2011-ah Bial KṚP Half-Year Meet hman ni rawh se.
4. 2011 chhûngin Bial huapin Bible Exam neih ni rawh se.
5. 'Bial huapin Leadership Training neih ni se, Thurêl General No.2-na nên kaikawpin 'Leadership-Cum-Bial Meet' hman nise, a hmunah Vanbâwng Branch ni se.
6. Bial hruaitu (O.B) atâna thlan chhuah te Post insiam rem dân, a inchhâwk tlânga kan lo tih thîn hi tih tâwp ni rawh se
7. Bial Zaipâwl term kum 1 chhûng atân ni se, rawngbâwl dân tûr chu Bial Committee-in lo ngaihtuah se tha kan ti.

Durtlâng Bial (Member 1309)

Durtlâng Kohhran Biak Inah 'Pathian nêna lên dun (Mika 6:8) tih thupui a neiin Speaker chu Upa R. Lalhmachhuana, Revival Speaker a ni.

Rorelte :

1. 2011-2012 Budget ₹.1,50,000/-.
2. Bial huapin Work Camp neih ni rawh se.
3. CKṚP hruaitu nominate-te hi Branch, Bial, CKṚP-a an lo inhman tawh dân chanchîn rorêl palaite'n

an hriatlâwk hmasak theih dân tûr buatsaih rawh se. (Central)

4. Presbyterian Hospital, Durtlâng-ah Bial KṚP hmingin Charity Fund-ah ₹ 5,000/- pêk ni rawh se
5. Bial O.B.leh Bial Zaipâwl-ten Branch tin tlawh chhuak rawh se.
6. Ram puma KṚP member kaltate súnna hun hi General Conference-ah leh Rorêl Inkhâwmahte hman thîn ni rawh se. (Central)
7. Missionary pathum (3) kan châwm mêk hi Pali(4)-châwm ni tawh rawh se.

Sangau Bial (Member 164)

Sangau Kohhran Biak Inah 'Tihdam i duh em?' (Joh. 5:6) thupui a neiin Bial hruaituten thupui hi an sawi a ni.

Rorelte :

1. 2011-2012 Budget ₹. 32,000/-.
2. Bial Kohhran Hmeichhia te nên Missionary kan inchâwm tâwm hi chhunzawm ni rawh se.
3. Kum 2012 Bial KṚP Conference Speaker atân Central KṚP hruaitute sâwm ni rawh se.
4. Kumin chhûngin bial huapin Leadership Training neih ni se.
5. Bial huapin Bible exam neih ni se.
6. Kum 2012 KṚP General Conference hi bial huapin kal ni se.

Mission Vêng Bial (Member 1940)

Tuikhuah tlâng Kohhran Biak Inah neiin thupui chu 'Isua Sipai tha' (II Tim. 2:3). tih a ni a, Bial hruaituten an sawi a ni.

Rorelte :

1. 2011-2012 Budget ₹. 1,56,000/-.
2. Bial chanchinbu 'Thalai Kantu' hi chhuah chhunzawm zêl ni rawh se.
3. Missionary 3 kan châwm mêk hi chhunzawm zêl ni rawh se.
4. Youth Recreation Centre (YRC) ram Hlimen a mi hi hmalâk zêl a harsa a nih chuan tih tâwp ni sela, sum khâwl sa zawng zawng hi rawngbâwna dangah hman ni rawh se. (Central)
5. Bial KTP in Bial huapin Solfa Camp buatsaih rawh se.
6. KTP din ni leh din tan dân hi ennawna chhuichian leh ni rawh se. (Central)

Keifâng Bial (Member 889)

Keifâng Kohhran Biak Inah Bial Silver Jubilee lawmna nen January 27-30, 2011 chhûngin an hmang a. Thupui 'Hma i sâwn zêl ang u' (Phil. 3:16) a ni a. Speaker atân CKTP aţangin TUPa Lallianmawia leh Pu Lalramdina Ralte an kal.

Rorelte :

1. 2011-2012 Budget ₹. 66,218/-.
2. 2011 chhûngin Bial huap KTP Meet neih ni rawh se.
3. 2011 hian Bial huapin Sport Meet neih leh ni rawh se.
4. Bial huapin zaipâwl Conductor Training neih ni rawh se.
5. Bial huapin Blood Donation cum Free Clinic neih ni rawh se.
6. Bial KTP chanchinbu (Thalai Kantu) chhuah chhunzawm zêl ni se.
7. Bial huapin 2012 chhûngin Workcamp neih ni se, kumin aţangin budget-ah dah ni se.

Venghlui Bial (Member 1522)

College Vêng Kohhran Biak Inah hmangin thuchah Rev. C. Sangliana, bialtu Pastor in a sawi.

Rorelte :

1. Bial Half Year Meet kan hman thin

hi Agenda-a telh kher tawh lovin kum tinin hman thin nise, a hmingah Half Yearly Meet tih ni tawh rawh se.

2. Krismas leh kumthar thianghlim zâwka hmang tûra inzirtir hi kalpui leh ni rawh se. (Central)
3. Bial Zaipâwl leh Bial hrutaituten Bial chhûng Branch tlawhchhuak rawh se.
4. Member hlate pualin mahni Branch-ah tawngtai tlaivâr hun inangah neih ni rawh se.
5. Youth Recreation Centre atân hmun remchâng dang zawn ni rawh se. (Central)
6. Hlemlêtnain nghawng tha lo a neih leh, chumi laka kan fihlim theih nân CKTP-in zir tûr buatsaih rawh se. (Central)
7. Central KTP-in HIV/AIDS chungchâng inzirtirna tûrin hma la rawh se. (Central)
8. Bial Half Yearly Meet-ah Group Committee member chin tân Seminar neih ni rawh se.
9. Bial chhûng Branch-te Committee hun inang tânga neih ni rawh se.

Phullên Bial (Member 1066)

Phullên Biak Inah January 27-30, 2011 chhûngin Bial KTP Silver Jubilee nêan an hmang a, thupui chu 'Pathian hnaih rawh u' (Jak. 4:8) a ni a, thupui hi Rev. K. Lalpiangthara, Leader, CKTP in a sawi. Synod Choir an kal baw.

Rorelte :

1. Bial chhûng Branch tinte zir tûrin Sex Education chungchâng Bial hrutaituten ngaihtuah rawh se.
2. 2012 Bial KTP Conference-ah Theme song neih ni rawh se.
3. 2011 chhûngin Bial chhûng Branch tinte intlawhthelhel ni rawh se.
4. 2012 Bial Conference-ah Bible Quiz neih ni rawh se.
5. 2011 chhûng hian Bial hmingin

Presbyterian Hospital, Durtlâng-ah thlupêk hlan ni rawh se.

6. 2012 Bial Conference thupui ah 'Rinawmna' ni se.

Zonuam Bial (*Member 816*)

Luangmual Vêngthlang Kohhran Biak Inah an hmang a, thupui awm lovin Bial hruaituten thuchah an sawi.

Rorelte :

1. Kum 2011 chhûng hian Bial KṚP Meet neih nise.
2. Bial KṚP hmingin Missionary pakhat (1) chawm belh ni se.
3. Kum 2011 chhûng hian Bial Sport neih ni se.
4. Kumin chhûngin bial huap Open Air Praise & Worship neih ni se.
5. Kumin chhûngin Bial KṚP property atân steel almirah leh Bial Secretary brief-case lei ni se.
6. Budget-ah Pastor Quarters pual sum dah ni se.

Lunglei Chanmari Bial (*Member 526*)

Farm Vêng Kohhran Biak Inah an hmang a, thupui nei lovin Bial hruaituten thuchah an sawi.

Rorelte :

1. 2011-2012 Budget ₹. 68,000/-.
2. Bial KṚP hruaituten kum 2011 chhûngin Bial chhûng Branch-te tlawhchhuak rawh se.
3. Kum 2011 chhûngin Bial KṚP hmingin Pastor Quarters-ah bungrua engemaw dah ni se.
4. Ramthar rawngbâwl nân Bial KṚP-in tanpuina sum pêk ni se.
5. Ṭhuamluaia mual remchâng laiah Pathian thuziak târ dân kawng zawn ni se.
6. Kum 2011 chhûngin Branch intlawhtawn leh ni rawh se.
7. Kum 2011 chhûngin Ruihhlo do/ Awareness Campaign neih ni se.
8. Kum 2011 chhûngin Lunglei Venglai Bial nân Bial KṚP Joint

Fellowship neih dân kawng zawn ni rawh se

Republic Vêng Bial (*Member 1669*)

Republic Vêngthlang Kohhran Biak Inah 'Malsawmna ni ang che' (Gen. 12:2) thupuia neinin Bial hruaituten thuchah an sawi.

Rorelte :

1. Bial KṚP hmingin Presbyterian Hospital-ah thlupêk pêk ni rawh se.
2. Bial chhûnga Branch te intlawh programme Bial KṚP in siam rawh se.
3. Bial huapin Zu leh Kristiante tih thupui zir ho ni rawh se.
4. KṚP General Conference Hlabu-ah hian member nâwlpuiin kan sak tân theih tûr hlate chauh dah ṭhin ni rawh se. (*Central*)
5. Bial Zai pâwl member-te hi Bial Inkhâwmpui zawhah ruat thar ṭhin ni rawh se.
6. Bial huapin Presbyterian kalphung zirho ni rawh se.
7. Bialin Missionary 3 kan chawm mêt hi chhunzawm zêl ni se.

Kolasib Hmarvêng Bial (*Member 644*)

Saidan Kohhran Biak Inah 'Lal Isua a lokal leh dân' tih thupuia neinin Bial hruaituten thuchah an sawi.

Rorelte :

1. 2011-2012 Budget ₹. 85,500/-.
2. Bial hmingin Missionary 3 chawm chhunzawm zêl ni se.
3. Kum 2011 chhûngin Bial KṚP Meet neih ni rawh se.
4. Kum 2011 chhûngin Bial KṚP-in Pastor Quarters hungna rawng hnawih ni rawh se.
5. Inneih lawmpuina Citation kan pêk ṭhin hi Biak Ina pêk dên kawng zawn ni rawh se.
6. Bial huapin Advance Krismas hman ni rawh se.
7. Bial KṚP hruaituten Bial chhûng Branch tlawhchhuak rawh se.

Hruaitu CHANCHIN

— Dr. Samuel Vanlalhlanga

Dr. Samuel Vanlalhlanga, Samu/Samuel tia koh hi Rev. Lalramliana leh Pi Lalchawiveli te inkârah January ni 13, 1973 khân Churachandpur, Manipur-ah a lo piang a, pianpui unau hmeichhia 3 a nei. Kum 2008 March ni 14 khân Venghlui nula Rev. R. Vanthangpuia (L) leh Pi Lalchhanhimi te fanu duatlai Lalngaihmanawmi (Mami) nênninnein fapa pahnih an nei a, tûnah hian Luangmual High School Vêng-ah an khawsa mêk a, Ft. 5' 6" a sâng Kg 86 a rit a ni.

Model School, Mission Vêng, Roseland School, Champhai, Mary Jones School, Chanmari, Govt. G.M. High School, Champhai-ah te kalin Shillong College ațangin BA (Hons) leh NEHU, Shillong ațangin MA (History) țha takin a zo a, M.Phil leh Ph.D hi J.N.U, New Delhi ațangin țha takin a zo leh a, July ni 17, kum 2007 ațang khân Govt. Aizâwl West College-ah Lecturer hna chelhin

vawiin ni thlengin rinawm takin a la thawk a ni.

Rawngbâwlna lamah pawh phâk ang tâwka tlânchhe ngai lo leh mi inpe a ni a. Director & Conductor - Luangmual Bial Zaipâwl, Conductor - Shillong Bial Zaipâwl, Asst. Leader, Secretary, Fin. Secretary - Shillong Bial KṬP, Leader, Asstt. Leader, Asstt. Secretary - Shillong Branch KṬP, Asstt. Leader, Secretary - Delhi Mizo Inkhâwm Ṭhalai Pâwl, Committee member - Delhi Mizo Inkhâwm, Leader, Senior Department - Shillong Kohhran, Leader, Senior Department - Luangmual West Kohhran bâkah rawngbâwlna chanvo engemaw zât a lo chelh tawh a. Tûnah hian President - NEICCYA, Asstt. Leader - Luangmual Pastor Bial KṬP, Leader - Luangmual West Branch KṬP, Convener - Kohhran Zaipâwl, Secretary - Kohhran Music Committee, Kohhran Thuhriltu (Pathianni chhun leh zan), Asst. Secretary - Kristian Chhûngkaw Committee, Leader - Sacrament Department leh Kohhran inkhâwm zai hruaitu nihna a chelh mêk bawk.

Khawtlâng lamah pawh theih ang tâwka inhmangin chanvo engemaw zât a lo chelh

tawh ðhin a, tûnah hian Executive Committee Member, Luangmual Branch YMA nihna a chelh mêk bawk.

Pu Samu-a hian mihring huat zâwng a nei hran lo va, mi rinawmte erawh a ngaihsâng hle thung. A nupui neih ni leh a fa neih ni chu a hun tawna a hlim ber hun niin vannneihthlâk takin lungngaih ber ni han sawi mai tûr a la nei lo.

KHB No. 261 "Isua neih ka duh zâwk" tih hi a hla duh ber niin Johana 3:16 hi a Bible châng duh ber a ni bawk.

Zai leh Academic Discussion- te hi a nuam tih zâwng tak a ni a, ei leh in lamah chuan chakai tih loh chu ei theih loh a nei hran lo

va, a vanneih a siamin engtik lai pawhin a chaw ei hi a tui deuh reng mai a ni.

Infiamna lamah chuan Football leh Badminton hi nuam a ti hle a, a vânglai chuan a lo khêl ve nasa tawh ðhin hle. India ram hmarchhak state Sikkim tih loh chu a tlawh vek tawh a, Mumbai tih loh India ram khawpui dang pawh a lo tlawh kual nual tawh bawk a ni.

Pu Samu-a hi pa zaidam, pa inngaitlâwm leh pa titi thiam tak, kawm nuam tak mai a ni a, a bula awm tawh phawt chu a kawm ngeih nghâl thei zêl a ni. Amah biak duhna i nei a nih chuan 9436362173 ah dial la aw dam takin a lo chhâwn ang che ♦



BIBLE SCHOOL HRIATTIRNA

Presbyterian Bible School, Mission Vêng, Aizâwl-ah Session
22-na atân Certificate in Theology (C.Th) Admission hawn a ni a. Dîl duhte tân a hnuaia târlan hi hriat tûr a ni e.

Admission Form : Office hun chhûngin a lam theih.
Dil hun chhûng : May 9, 2011 (Thawh ðanni) tlai dâr 3:00 thleng.
Dil thei chin : Class VII passed, kum 16 chin, Kohhran dân chhûnga awm.
Interview : May 11, 2011 (Nilaini) zîng dâr 10:00
Class tan hun : May 13, 2011 (Zirtâwpni)
Zir hun chhûng : May - August, 2011
Stipend : Zirlai hnênah thlatin Rs. 300/- pêk a ni. Hostel a awm lo.

Rev. V. Lawmkima
Principal, Presbyterian Bible School,
Ph - 2317343/9436352792

Sex Education

Hawlh pawlh...

Sex hi inneihna huang chhângah, kawppuite nêh, mâwi tak leh thianghlim taka hman tûr a ni. Kawppuite ni lo hmanpui hi uirena tenawm a ni. 'Lawng sùlhnu leh pa sùlhnu a hriat hran theih loh' tîh fiamthu hi dawt a ni. Engemawti takin a hnu a chhui theih ziah. Hawlh pawlh nun zawng a thianghlim thei ngang lo a ni. Pa ber nula ngaiin a nupui hnêna natna tîhbaiawm a khilai tâk an tam a nia. Natna chi hrang hrang inkaichhâwn theihna leh rilru lama harsatna thlentu uirena hi thihna khawp sual a ni. Inngaite leh uirete chu Pathianin a ngaihtuah dâwn sia.

A rai theih em ni?

Pathianin sex hi inthlahchhawn nân a siam a. Chi inthlah chhâwn thei lo tûr, mipa leh mipa te, hmeichhia leh hmeichhiate leh ramsate nêna hman hi Pathianin sex thianghlim lo a tîh zînga mi a ni. Thuthlung Hluid lamah phei chuan hetiang mi hi tihhlum nghâl tûr a tî tawp. Tûn hnai mai khân America rama state pakhat, Massachussets-ah chuan mawngkawhurte inneih theihna dân an pass mauh mai. Engtia ngaih tûr nge ni le?

Nula leh tlangvâl thenkhat chuan, "Vawikhat hmanin a rai theih em ni?" an ti hu hu fo. Theih tehreng mai. Hmeichhe chi leh mipa chi an intawn hun kha a fuh chuan wawi khat pawh ni se a rai theih.

Min hmangaih chuan...

'Min hmangaih chuan ka tân i inphal vek tûr alâwm' tia thlem thlûk theih nula an va tam em! An inpumpêk hnua hmangaihna tlan zui tûr nei ta si lo nun beidawng leh rilru nâ an awm zui t̄euh t̄hin. Hmangaihna hi kan chhuang hlur a, mi kar nân tak kan hmang ta t̄hin a. Hmangaihna hming kan tichhia. Sex hi hmangaihna tehfung a ni lo. Hmangaihna chuan a hmangaih takte chu a zah a, a thianghlimna a vawn thatsak duh t̄hin. A kar t̄ang t̄ang ngai lo. Hmangaihte tâna kan pêk theih hlu ber chu kan thianghlimna hi a ni a. Inneih zâna hawn atân kan present chu kan fûn t̄ha reng tûr a ni. Kan neih duh hauh loh tûr tihchhiat hi a sual thlâk. Inneih hmaa sex hmanpui tumtu che chuan a hmangaih lo che t̄ih hre rawh. A dil ngut ngut che pawhin a tisa châkna hrikthlâk lailâwkna leh int̄ihtheih zuina bak a dil lo che t̄ih hria ang che. Hmangaihna chu a dawhthei a, a thianghlim baw k si a ♦

(Source : KṚP Handbook)



HRINGLANG TLÁNG

Thlalêr ro tak maiah hian Cactus(pangpâr hlingnei chi) kûng pakhat hi a awm a. Engvânginngge chu hmun thlalêr, tûma tlawhpawhlohnaah chuan a awm tlat bîk le?, tiin a ngaihtuah thîn a. Tângkaina a neilo hlein a inhre bawk a.

‘Engmah ti lovin nilêngin helai hmunah hian ka awm tawp a, engnge ka tângkaina? Thlalêra hnim ʔo zîngah hian ka nalh lo ber lenghâl. Ka tângte hi a chhah ʔelh ʔulhin hling ka nei lehngghâl a. Ka hnahte lah a feiin a nâl zuak mai bawk a. Ka taksate hi a chhahin a bawk ʔek ʔuk a, khualzin veivâkte tân daihlim ka chhuahsak thei ve lo va. Ei tûr rah tuihnai hlui tûr pawh ka nei hek lo, tiin a innngaihtuah thîn a. A ni telin a ʔhang chhe tulh tulh mai bawk a.

Chhûnah chuan muvanlaite’n an thlawh kân a, ‘Engtinngge ka nun hi ka hman tângkai ve ang?’ tiin muvanlai rawn thlâwk delh delhte chu a lo au a. Mahse, hria awm pawhin a lang lo. Zânah thla a rawn êng a, thla hnênah pawh chuan a lo zâwt leh a. Mehse, thla pawh chuan chhân zai a rêl chuang lo. Thlalêr chu a chhun eng ruih mai a, a tângkai bîk êm êm mai a ni.

Chutihlai chuan laikîng pakhat hi muangchângin a rawn vâk pheï a. A mei hmangin thlalêr vaivutah chuan ziarâng mâwi tak a rawn siam pah zêl a. A bul a lo thlen chuan Cactus chuan, ‘Engtinngge nangni ang hian midang tân ka tângkai ve theih ang?’, tiin a lo zâwt leh a. Laikîng chuan nuihzat êm êm hian, ‘Nang hi zawng tângkaina i nei ve lo a nih hi. Vâna muvanlai thlâwkte chu a hmutu tân hmuhnaawm an tling a, thla(moon) pawh he thlalêr tân malsâwmna hnâr a ni. Zânah kawng min êntu a ni a, kan duhna hmun min thlentîr ʔhintu a ni. Kei laikîng takngial pawh hian ka mei hmangin mite hmuhnaawm tih tûr ziarâng ka thai ʔhin asin,’ a tih khum chiam mai a. Cactus tâna lungngaihna belhchhahtu mai a lo ni.

Kum te a lo vei a, cactus kûng pawh chu alo upa ve tial tial a, hun a nei tam tawh lo tih a inhria a. Beidawng êm êm hian, ‘Lalpa, mîte tân tângkaina ka nei ve rêng rêng lo. Ka damchhûng zawngin thil ʔha tih ve ka duh ʔhin. Mahse, ka thei ve lo, ka hun lah a liam a ni ruai tawh si. Min ngaidam ang che,’ a ti a. Chutia a ʔawng mawlh mawlh lai chuan a chhîpah chuan pangpâr mâwi êm êm mai hi a rawn pâr chhuak a. Chutiang ang rêng rênga pangpâr mâwi leh rimtui chu thlalêrah chuan a la awm ngai lo. A rimtui êm avâng chuan phêngphehlep ten an bâwm luih luih reng a. Amah ngaihsak ngailo ho pawhin a hlutzia an sawi châmchi ta hlawm a.

Cactus chuan aw-rî a hria a, ‘Hun rei tak chhûng i nghak a, i nghak chhuak ta. Thinlung fel, thil ʔha tih duhna nei tlat chuan ka ropuina a puangchhuakin midangte tân malsawmna a thlen ngei ngei ʔhin, tiin ♦

■ ■ ■ RIMAWI

MUSIC A KṬP TE
HMASAWNNA TUR

— *H. Lalthazuala(Puia)*
Synod Music Instructor
Chanmari West. Aizawl

Rum sâwm kal ta mai han chhuikîra Mizo ṭhalaite music-a kan dinhmun leh tûn hun hmân mêka kan dinhmun han khaikhin pawn a danglamin, thiamna zâwng leh hmanraw neih zâwnga chhût pawn hma kan sâwn hle mai. Amaherawhchu, tûn hun hman mêkah hian a hmangtu thiamna tak tak ai chuan, a hmanraw neih ṭhat leh ṭhat lovah kan intlânsiak ta mah mah niin a hriat theih. A pawimawh ber zâwkah chuan a hmangtu thiamna tak tak lam hi a ṭul hmasa zâwk reng fo.

Tûna Mizo ṭhalaite music a kan dinhmun han bihchian tak tak hian hmasâwnna tûr kan van ngah êm! Thil tam tak sawi tûr awm kârah, hêng a hnuaia ngaihpawimawh zual te hi tâwi tē tē in inbihchiang teh ang.

1 Biak In-a Piano/Key Board hmanga zaihruai :

Mizoram Kohhran Biak In-a keyboard hetiang khawpa hmang nasa tawh si hian zir tûr

leh hriat belh tûr kan la ngah hle. Ṭhalaiten Piano/Keyboard a Biak In zaihruai awlsam riauva hriatna te, hun reilote chhûng zira thiam viau theih a kan ngai tlat te leh kan basangam lutuk te pawh hi a ṭhatna chen awm mahse, kan la hriatchian loh lutuk vâng a ni ber mai! Hnamdang lakah pawh zahpuiawm lêm lo tûr a hruai thiam tûr te, a nihna tûr ang taka hmet/tum(play) thiam tûr chuan a reilo berah kum hnih aṭanga kum nga tal chu regular taka zir ve a ngai tlat! Kan hriat tlêmna leh thiam tak tak lohna hian min tithlamuang mai mai a ni.

A tlângpuiin Kohhran Biak In-a Piano/ Keyboard-a zaihruaitu, hmettu za zêla sawmthum (100/30) vêl hi chu music note leh solfa pawh chhiar thiam mumal lo kan ni a. Za zêla sawmruk (100/60) vêl hi chu music note, solfa leh chords te pawh chhiarthiam inti, inring tawk êm êm kan ni bawk. Mahse kan hmeh dân, kan hruai dân kalphung(style) erawh chu a dik lo tlat! Malzai (solo) rem ang vekin kan hmet/kan hruai ta mai a, hei tak hi paih a, hmathar lâk a ṭul! Hnam upa zâwk, hnampui zâwk, music lo hre hmasa leh thiam hmasa zâwk ten, Zoram Kohhran Biak In tam zâwka kan zai hruai piano/keyboard hmeh ang hi chuan Biak In-ah piano/

keyboard an hmet ngai lo. A kallhman laia hi hriatchian a zir chian hmasak a ðul mang e. Tin, za zêla sawm (100/10) vêl hi music note, solfa etc, chhiar thiam mai chu sawi loh, a hmeh(play) dân tûr tak leh dik thlap a hmet/hruai thei kan ni thung. Hetianga hmang thei tûr leh piano/keyboard hmeta zai hruai thei tûr chuan zir nasat a ngai a, harsat pawh a harsa rêng a ni. Biak In-a zai hruaina bikah chuan mahni mâwi tih zâwn, duh dân leh ngaih dân a phuah kual, hmeh kual mai mai chi a ni lo. A solfa inziak ang thlapa hmeh mai tur a ni.

Chutiang a nih si chuan, Biak In-a mipui zai hruai nân engtiang takin nge Piano/Keyboard chu hmeh (play) tûr? Enge kan tih dân a dik lo paih tûr leh ðanlâk dân tûr tih lam chu ziah sên a ni lo a, a zirna hmun lamah kan luhchilh a ngai ta a ni.

2 Solfa hla phuahu/ Siamtu/ Harmonise tu lam : Mizoram ðhalaite zingah hla phuah thiam tak tak mi kan tam ta hle, an hla pawh Pathianin a hman êm êm, kan hlimpui tak hla mâwi leh ðha tak tak a tam ta hle baw. Mahse, solfa hla harmonise ðhintute lam erawh chuan ðanlâk kan ngai hle mai! Kan inpêkna leh tumna lam erawh chu ngaihsânawm tak a ni. A tam

zâwkte hi chuan kan ngam lutuk ta mah mah, kan huaisen mah mah, kan risk nasa lutuk ta deuhin a lang. Harmonise hmaa hriattûr leh thiam hmasak tûr tam tak hre hmasa leh thiam hmasa lo hian kan ti ve pawp ta zel mai! Han belhchiana phuai fê fê leh dik tawklo tam tak hmuh tûr sawi tûr a awm. Hla harmonise-tu nih duh ve hrim hrim avânga ti ve tawp zêl ho hian, kan hla leh hla thlûk ðha, ro atâna tling tûr leh hlutna tûr an tichhe deuh ðhin. Kan thlen chin a tang hian ðan ila ang u.

3

Zaipâwl hruaitu / Conduc tor lam : Tûn dinhmun han thlîr hian zaipâwl conductor ten ðanlâk kan ngai ta hle mai! Music hriatna leh thiamna tak takah te, a hmanrua hman thiam kawngah te ðan ila ang u. Music hriatna nei mumal lo, thiamna nei tak tak lo leh instrument pakhat tal thiam taka hmang thei lo tân chuan Zaipâwl conductor ðha tak nih a har khawp ang. Conductor chu musician ni tel thei se duhthusam a ni. Tin, Kohhran Zaipâwl, Bial Zaipâwl leh thlan bik zaipâwl rêng rêng kan zai dânphung leh music kalphung inang tlang ta vek mai te hi conductor ðanlakna tûr a ni. Chubâkah, kan solfa vai dân te leh kan vai chhan tepawh hi bihchiana hmathar la a

hmasâwn tûra ke pên tak tak a tûl ta bawk. Zaipâwl conductor te hian mi zai dân leh tih dân ngawt ring lova, style thar nei tûra tanlâka luhchilh a ngai ta hle mai! Sawi tûr tam tak awm mahse, kim lo taka kan târlan te hi hmatar lâl nân KÏP ten i hman ang u..

A tâwp berah chuan, music hi he khawvêl atân mai ni lo, vân thlenga kan chhawm zêl tûr awm chhun a ni tih Bible ațangin kan hmu. KÏP member

te hian Lalpa kan fak tak tak theihna hmanrua chu music hi a ni. Music thiam miah lo tân pheichuan vânram chu a nuam famkim kher lo ang. Kohhran hruaitu hmasa Martin Luthera chuan- *music hriatna leh thiamna nei miahlo chu Kohhran rawngbâwltu ni tlâka ni lo a ti hial a ni*. Chuvângin, Kohhran leh Music hi engtiklai pawha inkawp tlat, lâl hran theih loh a nih avângin KÏP te hian music-a hmasawn turin tan ila zêl ang u♦



SYNOD BOOKROOM BOOK NEWS

(Synod Bookroom lehkhabu thar thenkhatte)

- 1. Rorelna Dik** : India ram hi dân rorelna ram a ni a. Dan hriatloh hi chhuanlam a tling lo. Ringtute pawh he India dân hian min phuar vek a, rorêltute thua awm hi Bible zirtîrna a ni bawk. Mimal chanvo leh dikna humhalhna leh sawrkâr dân bawhchhiate hrem theihna leh theih lohna dân chi hrang hrang, Laldinpuia Tlau ziah, a man ₹. 50/-
- 2. Beiseina Mittui** : He lehkhabu hian hausakna, rettheihna, rinawmna, phatsanna, inbumna, phiarrûkna, hmangaihna der leh hmangaihna dik, beidawmna leh beiseina bâkah engkim a chuang! Samson Thanruma buatsaih a ni a, a ₹. 250/- man a ni.
- 3. Chuailo 2** : Pangpâr mâwi tak chu chuai mahse a hun takah a ngaitein a vul leh mai a. Mihring erawh chu keimahnî hunah, keimahnî hmun ngeiah kan vul a, kan liam hlen thin. Liam hlen ve tho tûr, R.L Thanmawia chuan liam hlen ve lo tûr thu leh hla mâwi tak tak min hnutchhiah e, a man ₹. 80/-
- 4. Dâri Pasal** : Thlirna hrang hrang ațanga mi kutchhuak inthlirsak thiam hi Mizote'n kan mamawh ve ta hle mai. Mizo zînga thuziak mi, khaw hrang thah, nupui hminga 'Dâri' nei thiau mi pathum; Zîkpui Pa, L. Keivom leh Rev. Lerthansung te thuziak faksêl chung a ziah dik loh laite thur chhuaka dik nia a hriat dan R. Lalthazuala'n (Dâri pasal ve tho) a rawn pholanna bu hi lehkhabu chîkmithe thian a tling. A man ₹. 150/-
- 5. Barak Obama chanchin** : Ram ropui America president 44-na leh America mihângte zîng ațanga USA President nihna dinhmun sâng tak chelh hmasa bertu, 'Nobel Peace Prize' chawimawina hial dawngtu chanchin chipchiar, Kenneth Chawngliana buatsaih chu a lo chhuak ta. A man ₹. 150/-
- 7. Sulhnu Hliam** : Nula hmêltha chungchhuang Baby chu chin hriatlohin a khuangcher bo a. A bialpa chu nikhaw hre lovin, mi â ang maiin a awm bawk a. Hnamdang lakah pawh a hmêl chhuan tham Baby chu engtia bo nge? A bialpa chuan a ât hlen phah dâwn em? Nula hmêltha leh duhawm chu a hmêlthatna chuan thang hlauhawm lutukah a hnûklût zâwk em ni? Samson Thanruma buatsaih ₹. 70/- man.

HRISELNA ■■■■

AIDS natna

Khawvêla natna hlauhawm ber pakhat chauh sawi tûr ni ta se, AIDS natna hi chhâna dik a ni ang. Engvângin nge Cancer te, TB te, Khawsikpui te aia a hlauhawm? Natna dang rêng rêng chuan enkawl na damdâwi a nei veka, Aids natna erawh hi chuan damna atân damdâwi tak tak ala nei lo a ni.

Aids natna leh a hrik an hmuhchhuahna hi kum 1981 kum kha a ni a. Mahse kum tam tak kaltawha a chhan hriatloha thîte thisen vûra an vawn that te chu an han test-in Aids hrik an pai tih finfiah a ni a. Eng hun aţanga mihringte hian vei leh thihpui ţan kan nih tih hi chhân thiam a harsa a. A tîr berah chuan ngaw kâra zawng rualin an vei phawt a, engtin emaw mihringin kan vei ve chauh a ni.

Aids natna kan tih hming awmzia hi Acquired Immuno Deficiency Syndrome a ni a. A awmtîrtu hrik hi virus, Human Immunodeficiency Virus(HIV) a ni. Kan hriat angin virus natna avângin mi an thi vak vak ngai lo. Aids natnaah erawh chuan he virus hian natna dotheihna a tih chhiat vek avângin, taksa kulhpui kha vên lohina a awm ta a. Natna hrik engtân pawh hneh

theihin a lo awm ta mai a ni. Tichuan aids natna vei dân tlangpui chu engpawh a ni thei ta a ni.

A tîrah chuan insawisêlna nei lovin Aids hrik an pai a, mi dangah an thehdarh ţhin. A hnuaah chuan taksa hmun hrang hrangah 'bê' (gland) a lo vûng a. An chak lo a, an nguai a, chhan malman tûr awm lovin an chau hluah hluah ţhin. Thenkhat chuan khawsik reh har tak an nei a. Kâ leh ka chhûng pân te, chaw ei tui lo leh chaw ei thei lo, luak te, kawţha lo te, an lo nei ţhin. Ril aţanga thisen chhuak te, lu na tak te, vun na sup sup te, natna hrik dang inrawlh avâng a thluaka khawsik lût te, mitdelna te, a thlen thei. Damlo tân vuna pân dam thei lo leh pân lo pung zêl chu a ngaih-mawhawm zual ţhin.

Naupangin an vei chuan, nute aţanga an kai a ni ber a, naute chu a ţhang ţha thei lo a, natna do theihna a tlahniam a, thluak lam a khawih a, taksa leh rilru lamah rualban lo an ni a. Mi ang hrâm pawh ni se, tual an chai thei tih vêlah Aids natna avângin an thi tho tho dâwn baw a ni.

Engtia inkai chhâwn nge ?

A vei te thisen leh taksa tuihnâng aţangin inkai a ni ber a. Inpâwl na aţangin a inkai theih a, inchiuna hriau thianghlim lo aţangin a inkai theih baw. Aids vei rêng rêng za zêla 85 chu

Drugs Addict leh mihur an ni.

Damlo thisen inpêk ațangin a kai theih a. I taksaah pem chhete pawh awm se, Aids hrik pai thisenin buak ta se, Aids i kai chhawng thei tihna a ni.

Aids hrikpai nu hnên ațangin naute pianghlimin a kai theih a. Kuta inchibai ațang leh Aids vei ținutna hnua ținutațangina kai theih loh a. Infawh(kaa infawh) ațang chuan a inkai theih dân a awm.

Taksaa Aids hrik HIV a awm hian an damlo nghâl mai lo a. Hrisêl tak angin an awm a. Hei hi he natna thehdarhna hun remchâng tak a nih avângin Aids hrik pai te hi Aids vei țintîr an ni a, fîmkhur a țin hle.

Aids hrik HIV pai leh pai loh hi thisen exam-a fiah theih a ni a, amaherawhchu kai ațanga thla thum chhângin exam-naah a la positive hman lo țin a, hei hi 'window period' an ti a. Vawi

khat ena țin pawh ni se, vei lo-a pawm theih a ni lo.

An inpuan duh loh avângin emaw, hriat loh vângin emaw Aids hrik pai ten nupui pasal nei ta se, a veitu leh a khingpui leh a fate tam zâwk chu Aids natna hian a suat vek thei a ni. Pathian hre loa, nawmchenna, mipat hmeichhiatna leh zu leh sa leh drugs lama tlan te hian an taksaah leh hrisêlna thua natna hlauhawm tak Aids natna an kai theih avâng hian America rama thuhrlitu țin khat chuan 'Pathian hremna' natnaah an ngai hial a. Chu êm chu a ni lo thei e. Kristian nun pângngai, thianghlim taka nungte tân Aids natna vei hia hlauhawm hran lo a. 'Uire suh' tih thupêk zâwm țin tute chuan he khawvêl leh khawvêl lo la awm tîr atân malsâwmna thua hnih an dawng dâwna ni. (Source : Hriselna Lamtluang)



SMTC HRIATTIRNA

Synod Multipurpose Training Centre, Mission Vengthlang, Aizawl-ah Certificate in Computer Application Course(6 month) training-na hawn a ni leh dawn a. Application Form chu Office hun chhungin Office-ah lamin a hnuaia hming zia k hnenah hian Kohhran lehkha nen thelul tur a ni.

Dilna thelul ni hnunung : March ni 21, 2011

Screening tset leh interview : SMTC, Mission Vengthlang, Aizawl neihna hmun

Screening test neih hun : March ni 22, 2011 (Thawhlehn) 10:30a.m.

Interview hun : March ni 24, 2011 (Ningani) 11:00a.m.

Class țin hun : April ni 5, 2011 (Thawhlehn) 9:30a.m.

Dil thei chin : HSLC Passed

Rev. Lalrinnunga
Programme Director, SMTC



Hriatzauna

PATHIAN HMANGAIHNA ROPUIZIA

Kan hringnun zinkawng – khâm leh suar, biboh leh ̣itoh tak tak, ruahthimpui leh ̣o thlipui a rawn thawh vûk vûk laite, dam chhûng ropuina lem thlîr a, rilru hah leh beidawng, lungngai leh mal êm êma kan inhriat châng te hian inngahchhan tlâk, hmangaih leh lainat tâwpchin nei lova min kuangkua h tlattu a awm reng tih hi kan theihngihl leh mai ̣hin.



Frederick Martin Lehman (1868-1953)

Sualna khur thûk berah pawh tlu tawhin kan mihringpuite thlahthlâk leh hnualsuat pawh lo ni tawh mah ila “*Pathian hmangaihna ropui*” chuan min thlahthlam ve lova. Min zawng zêl a, min kalsan lovin min ûmzui zêl zâwk ̣hin. Chu “*hmangaihna ropuizia*” hmutute chuan thlamuanna sawi hleih theihloh an nei a. “*Vuina tûr rêng alo awm lo,*” tiin an nitin hunbi an chhiar ̣hin. Chu nun chu an tlanbosan phal tawh lova, a chenin an chen ̣hin a ni. Pathian chu lo tlanbosan lehin, lo tlûkbosan ta tehreng ̣hin mah ila, a “*hmangaihna*” erawh a chuai ve chuang hauh lova, nitin a zual zêl zâwk ̣hin. A thûkin a ril a, sawifah theih a ni lova, a chana chan a, a neiha neih chi a ni.

Kan Kristian Hlabu No. 43-na, Pathian rawngbâwltu ropui Frederick Martin Lehman-a hla phuah “*Pathian hmangaihna ropuizia* (The love of God)” tih hla hi Pathian hmangaihna

ropuizia, thûkzia leh zauzia sawifiah Chiang Bertu Pakhat a ni awm e. "The World's Best Hymns" an tih "Fakna hla tha thlankhâwm" zîngah pawh khawvêlin an hla duh ber pakhat a ni. Kristian hlabu-a hlate zîngah hian a tha ber chu a tih theih hauh lovanga, a rilzia erawh hi chu belhchian dâwl tak a ni. Mizo ƣawnga letlingtu Upa Dr. L.N. Tluanga hian kum 1933 daih tawha a lehlin kha a ni na a, a letling nalh viau mai, hetiangin:-

*The love of God is greater far than tongue or pen can ever tell;
It goes beyond the highest star, and reaches to the lowest hell.*

*The guilty pair, bowed down with care. God gave his Son to win;
His erring child He reconciled, and pardoned from this sin.*

*O love of God how rich and pure!
how measureless and strong!*

It shall forever more endure. The saint's and angels song!

*When years of time shall pass away,
and earthly thrones and kingdoms fall, When men who here refuse to pray,
On rocks and hills and mountains call,*

*God's love so sure shall still endure,
All measureless and strong;*

Redeeming grace to Adam's race The saint's and angels song.

A chang tawp berna,
*Could we with ink the ocean fill,
And were the skies of parchment made,
Were every stalk on earth a quill,
And every man a scribe by trade,* ...a han tih pheih chuan Pathian hmangaihna zauzia hi a puangchiang hle a ni. Khawvêla tuifinriata tui zawng zawngte pen-tuiah changin, thing kûng zâr zawng zawngte chu ziakfung (quill)-ah hmang vek dâwn ila, a ziah hnem theih tûr zia te, kan chung lam vân zau lutuk, tâwpchin neilo pawh chu lehkha phêk-ah chang hialin, khawvêl mihring zawng zawng hian "Pathian hmangaihna thu" chu zia ta ila.....

*To write the love of God above Would drain the ocean dry;
Nor could the scroll contain the whole, Tho stretched from sky to sky.*

'A hmangaihna' thu hi puan sên a ni lo; kan zia sêng hek lovang. Zia dâwn pawh ni ila tuifianriat-a tuite a kang ang a, enganga lehkha phêk hlai pawh nise ziahna-in a daih dâwn lo, puan sen chi a ni lova, puan zawh rual alo ni lo. Pathian hmangaihna hi alo va ropuiin alo va thûk tak em! tih hi a ni mai. Chuti khawpa "Pathian hmangaihna ropuizia" chu I hmu ve tawhin i nei ve tawh em le?? A va ropui em!!! Amen♦



KANTU

**Sihphir Vêngthar Br. &
Mêlthum Br.**

SIHPHIR VENGTHAR

Sihphîr Vêngthar Branch, ka kan a, anni hi October 31, 1971-a ding t̃an anni a, t̃unah hian member mipa 398 leh hmeichhia 193 lai mai awmin, theihtawp chhuahin Pathian rawng an bâwl t̃hin. An branch inrelbâwl na at̃an Sub-Committee hrang hrang, Programme, Evangelical Cell, Media, Decoration, Property, Refreshment, Faith Promise sub committee te siamin an branch hmalâkna leh rawngbâwl na at̃an an t̃ang kai hle.

A t̃langpuin thawht̃an z̃anah hian member 139 ṽel an inkhâwm t̃hin a, za z̃êlah 23.14 percent inkhâwm t̃hin ang an ni. Thawht̃an z̃an hian Sermon, Sharing, Short Sermon Variety Programme te an hmang t̃hin a, tin t̃un thlengin Kohhran Zaipâwl nung leh thiamtak mai an nei thei a, Kohhran Zaipâwlah hian member 50 awmin, Kohhran hun pawimawh bâkah K̃TP programme hrang hrangah an zai thei z̃êl t̃hin a, k̃arkhatah t̃um hnih Thawhle h z̃an leh Pathianni t̃lai hian hla an zir t̃hin. Sum an tuak dân t̃langpui chu, Faith Promise,

Group Budget, Inhlawhna, Lehkha Ip sem, Inkhâwm Thawhlawm, K̃TP RCC Building luah hawh t̃ir man a t̃angtein sum an tuak t̃hin.

Kohhran kal t̃langin Missionary paruk(6) an ch̃awm m̃êk a, an branch member mi panga(5) lai mai Missionary in an chhuah m̃êk bâkah kumin hian Missionary pakhat(1) an branch a t̃ang hian a chhuak leh tawh bawk.

Kristian T̃halai hi kuminah copy 70 an la m̃êk a, copy 1 hi member 8.2 in inchhiar t̃awm ang an ni.

An branch a Sub-Committee pakhat Evangelical Cell hmalâkna Pathianin mal a s̃awm a, member ten harhtharna an chang nasa hle a, K̃TP inkhâwm leh Kohhran inkhâwm pawh a nawm phah hle. An member mi pathum(3) in Presbyterian Bible School-ah C.Th an passed thar bawk. Sound system ₹. 71,826/- man lai mai an lei thar bawk. Nikum khan kumpuam bawhzuina atan Ruihhlo ngaite pual camping hlawht̃ling tak an nei thei bawk.

An Branch in Lungrual leh hlim taka Pathian rawng an bawl t̃lang thei hi an lâwm hle a ni ♦

MELTHUM BRANCH

Kum 1955 October khân an dîng ʔan a, tûnah hian member mipa 210 leh hmeichhia 104 an vaiin 314 an awm a. Hlimen bialah an awm mêk a ni. Kumin hian member te Group thumah inʔhenin Group te hi Branch chakna bulpui ber an ni a, kum khat chhûngin budget ʔum hnih nei ʔhinin an budget te hi an khûm hial ʔhin a ni.

October 11, 2005 khân Branch Golden Jubilee ropui takin an lo lâwm tawh a, Branch member te inlungual leh hlim tak an ni. Branch thla thar Committee apiangin Committee member ten buhfai keng khawmin mi harsa zâwkte an pe ʔhin a, zawngchangtlâk an ti hle.

Lal Isua hnung zuia Chanchin ʔha puandarh hi an ngaihpawimawh ber a ni a, an member aʔangin mi pali Missionary atân chhuak tawhin tûnah hian Missionary pariat an châwm mêk bawk a ni.

An Branch hian a hranin Budget an nei ngai lova, an sum hmuh ang ang hi ʔûl leh mamawhah an hmang mai ʔhin a ni. An sum hmuhna hrang hrangte chu Inkhâwm thawhlâwm, Committee member leh member-te Faith Promise, neihtil/thiamthil thehkhâwm, hnatlâng leh

Group budget-te hi an sum tuakna bulpui ber a ni. Faith Promise bikah hian Branch O.B. te hian a hranin Budget an intuk a, inhlawhna bâkah mahni remchân angin an thawhkhâwm ʔhin. Committee member-te pawhin member dangte aia sângin budget an intuk bawk ʔhin a ni.

Kohhran leh KTP mamawh Sound System lam pawh changtlung tak an nei a, ti changtlung zêl tûr pawhin hmachhawp an neih belh zêl a, hetiang lama harsatna awm thei chu pumpelh an tum hle.

Central KTP aʔanga tihtur awmte ʔha taka ti thei zêlin hlawkthlâk an ti ʔhin hle. Kristian ʔhalai chanchinbu hi nikum-ah 33 lain kumin hian copy 55 an la a, hma an sawn hle.

Kum tâwpah hnatlâng kim, Branch Committee kalkim te hnênah lawmpuina thilpêk an pe ʔhin a, hêng bâkah hian an member kum sawmthum chunglam leh kum sawmhnih hnuaillam, member pumpuia active ber te thlang chhuakin lawmpuina thilpêk an inpe ʔhin a. Krismas-ah mi harsate an ʔanpui ʔhin bawk.

Hruaitute leh member-te an inpawh tlan êm avângin thawhhona ʔha tak nêh hlim leh lâwm taka Pathian rawngbâwl hna thawk ʔhin an nihna hi an entawntlâk hle♦

Keimahni



■ February ni 2, 2011 (Nilaini) khân PYF Central Committee Meeting Shillong-ah neih a ni a, Pu Vanlalfinga, Fin. Secretary, CKTP chu Committee Member a nih angin a kal a, thu pawimawh tak tak an rel a ni.

■ February ni 10, 2011 (Ningani) khân R. Lalmalsawma, Bethlehem Vêng (Synod Choir Member) chuan Bethlehem Kohhran Biak In-ah Lalmuanpuui Hnamte, Bethlehem Vêngthlang chu Kohhran Dân Thianghlimin a nei. Kan lawmpui a, fanau malsâwmna an dawn ngei theih nân duhsakna kan hlan e.

■ Synod Choir rawngbâwlina :

(1) **Chanmari West Branch** : Ni 6 January, 2011 (Ningani)-ah Chanmari West Branch Silver Jubilee hmanpuuiin vawikhat zaiin hla pahnih (2) an rem a ni.

(2) **Muallungthu Bial** : Ni 14 January, 2011 (Zirtâwpni) zânah Muallungthu Bial Silver Jubilee lâwmna KTP pual programme an hmanpui a, ÷um hnih zaiin hla pali (4) an rem.

(3) **Phullen Bial** : Ni 29-30 January, 2011 khân Phullen Kohhran Biak In-ah Phullen Bial KTP Conference leh Silver Jubilee hmanpuuiin an kal a, ÷um li zaiah hla pakua (9) an rem a ni.

(4) **Tuikual Kohhran** : February ni 5, 2011 (Inrinni) zânah Tuikual Kohhran Golden Jubilee lâwmna inkhâwm an hmanpui a, ÷um hnih zaiah hla pathum (3) an rem.

(5) **Bethlehem Kohhran** : February ni 10. 2011 (Ningani) khân Bethlehem Kohhran Biak In-ah R. Lalmalsawma Synod Choir Member nupui neihah hla pakhat an rem.

■ **Branch ding thar** : Lawngtlai Chanmari Bial chhungah August ni 29. 2010 khan Saizawh 'E' Branch a ding thar a, Ni 3 Feb., 2011 khan registration fee an rawn pe. Member mipa 14 hmeichhia 6, an vaiin mi 20 an ni.

Ramhlun Bial chhûngah January ni 3, 2011 (Thawhtanni) zân khân Ramhlun Vêngchung Branch a ding thar a. Ni 1.2..2011-ah registration tih a ni a, Member mipa 137, hmeichhia 93, an vaiin 230 an awm a ni.

CENTRAL KTP COMMITTEE, 2010-2012

Leader	:	Rev. K. Lalpiangthara	9436143955
Asst. Leader	:	Pu Zohminglana	9436159856
Gen. Secretary	:	Upa Lalrinmuana	9436142643
Asst. Secretary	:	T. Upa Dr. C. Zarzoliana	9436154486
Treasurer	:	Pu Lalmuanawma	9436196819
Fin. Secretary	:	Pu Vanlalfinga	9862303241

Committee Members

Pu H. Liantluanga	9436361167	Pu Lalthanmawia	9436141879
T. Upa Lallianmawia	9436192743	Pu Lalrohlua	9862573500
Dr. Samuel Vanlalthlanga	9436362173	T. Upa Zothangzuala Chhange	9436152841
Pu R. Lalhmingshanga	9436152362	Tv. Zohmangaiha	9862018161
Tv. Vanlalthruaia	9436146913	Pu Lalhruaizela	9436156832
Pu Lalramdina Ralte	9436360865	Tv. V.L. Muanchhana	9862976771
Pu Lalnghinglova Hauzel	9436141979	Pu Saizamlana Sailo	9436148727
Pu Lalmuanp	9436142398		

Ex-Officio members

Rev. C. Chawnglana	-	Synod Moderator
Upa Vanlalthuma	-	Synod Secretary (Sr.)
Rev. Lalzuthanga	-	Executive Secretary, i/c KTP

SYNOD CHOIR THROUGH THE AGES DVD

Synod Choir a din tirh atanga waviin thlenga zaipawla tel tawhten an hunlaia an hla lar hrang hrangte an dah khawmna DVD 'Synod Choir Through the Ages' February ni 4, 2011 (Zirtawpni) - a tlangzarh tak chu KTP Office ah ₹. 100/- in hralhchhuah a ni. He DVD ah hian heng hlate hi dah a ni :-1. Make a joyful noise 2. Aw, mitinin kut beng ula, 3. Lead Me, 4. Saved, 5. Tawpna Ni, 6. Ka nunah hian Isua, 7. Pathian hmangaihna, 8. Min hmangaihna ropui, 9. Chan Mei chu, 10. Nang i Thianghlim si, 11. A chhelai siamthatu 12. Inpeih thuai rawh, 13. Ni tlakna piah lamah, 14. Pathian ropui rawh se, 15. Halleluia Chorus



Picture : Group hrang hrangte shooting nei lai

PYF Biennial Conference

Presbyterian Youth Fellowship (PYF) Biennial Conference vawi 19-na chu April 29 - May 1, 2001 chhûng hian Chanmari Kohhran Biak In, Aizawl-ah neih a ni dâwn a. Central KTP Committee meeting-in a rêl angin February ni 8, 2011 (Thawhlejni) zân khân Chanmari Kohhran Committee room-ah Chanmari Kohhran Committee, Chanmari Branch KTP Office Bearer-te leh Central KTP Office Bearer-te'n Joint Meeting neih a ni a. Hetah hian PYF Biennial Conference Central KTP-in kan thlen tûr chungchâng leh a nghahna Kohhran lam leh Central KTP Committee-in hma kan lâk dân tûr hrang hrangte sawiho a ni.

Central KTP Meeting

February 16, 2011 (Nilaini) khân Central KTP Committee meeting Synod Office Committee Room Fah neih a ni a. Hetah hian KTP Rorel Inkhâwm, March ni 11-13, 2011 chhûnga Bethlehem Kohhrana kan neih tûra Agenda Bial atanga lût 60 chuang zet leh CKTP hruiatu leh Synod Choir sâwmna 40 zet awmte leh thu pawimawh hrang hrangte rêl a ni.

KTP Day

February 22 kha KTP Day a ni a. Hemi ni hian Branch hrang hrangah zîngkâr hnatlâng te, awmni khama hun hman te, zânlam programme leh a mamawh apiangte hman tûra thisen pêk tein hun hman a ni. KTP Day hman dân tûr chungchâng hi Central KTP chuan nikum lamah kaihruaina alo chhuah tawh a, Branch tinin mahni remchân anga proramme siamin KTP Day pual hian hun kan hmang thin a ni.



CKTP Hruaitu
CHANCHIN
Dr. Samuel Vanlalithlanga
Phek 19



Sumsuih Bial Conference-ah Pu Finga leh Tv. Muanchhana, anmahni tawiawmto Mission Veng Pastor Bial Zaipawl, Ruatpuii, Akima, leh Bial Hruaitu leh Sumsuih Pastor Bial Zaipawl-te



Champhai Vêngthlang Bial hruiatu, Pu Rinmuana, G/S, leh amah tawiawmto Upper Republic Br. nulate Bial Conf.-ah



Kantu - Sihphir Vêngthar Branch



Kantu - Mèlthum Branch